

Thursday, January 15, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

CM

Chief Minister Pu Lalduhoma'n thlai thar chhuah hmangin Mizoram chuan ram dang hriat a hlawh chho mek tih sawiin thalaite kuthnathawh uar zel turin a sawm.

Vawiin khan Vanapa Hall-ah Farmers Training on Scientific Rubber Cultivation, Harvesting Techniques, Post-Harvest Handling and Pest Management chu hawn niin, khuallian Pu Lalduhoma chuan, Rubber chu hun rei tak daih, a chingtu mai bakah an fate tana in rochun theih eizawna a nih avangin uar zel a tha tih a sawi.

(Byte : CM Lalduhoma)

Mizoram Rubber Society (MIRSO) buatsaih hun a hman puinaah hian Chief Minister chuan, Mizote chu tun hma atanga kut hnathawk nasa ni mah se hriat hlawhna khawp thar chhuah a awm ngai meuh lo niin a sawi a, tunah chuan Sawhthing hmangin hriat a hlawh tih sawiin Sapthei pawhin hriat a hlawh chho tan a ti a, a dawttu ah Rubber ni thei tura beisei a ni tih a sawi.

Pu Lalduhoma chuan, Rubber chuan ramngaw a ti chereu ngawt lo tih sawiin ramngaw a siam bakah leilung luangral tur a vengin tuihna pawh ti pung thei tura ngaih a ni a ti a. Mizorama Rubber chin theihna tur hmun tha zau tak awm chu a chingtu lamin an la hnawhkhat zo lo hle niin a sawi bawk.

Khual zahawm, Land Resources, Soil & Water Conservation Minister Pu Lalthansanga pawhin thu sawiin, Rubber chin chu Chief Minister-in a ngaipawimawh hle tih a sawi a, sum an hmuh theih nan NABARD, SASCI leh Bana Kaih atangin an lakhawm a, kuthnathawk tuten an hlawntlin pui ngei theih nan theihtawp an chhuah tih a sawi bawk.



IMD FOUNDATION DAY

Meteorological Centre, Aizawl chuan vawiin khan India Meteorological Department din champhaphak vawi 151 na pualin Berawtlang, Aizawl ah hun an hmang a, IMD pawimawhna hrang hrang leh a hnathawh tarlanna atan hun hman a ni.

Vawiina hun hman hi Director General of Meteorology, Dr. Mrityunjay Mohapatra, leh Deputy Director General Dr. Sanjay O'Neill Shaw ten an tel pui a, Meteorological Centre, Aizawl Director Sudheer Kumar Dwivedi chuan khua leh tui tana IMD hnathawh hrang hrang tarlangin an hmalakna tura hmachhawp hrang hrang a sawi a, an hnathawh kawngah sawrkar thlawpna an hmu tha tih sawiin Mizoram khua leh tui te nena an thawhhona chu chhuanawm atih thu a sawi.

Vawiina hun hmanah hian IMD pawimawhna hrang hrang leh a hnathawh tarlan niin khaw chinchang hrilh mai piah lamah huan thlai enkawl kawnga an hnathawh dan te tarlan a ni a, chhiatna thleng thei hmun hrang hranga hriatirna an pek thin chuan zawm a hlawh tha hle niin an sawi a ni.

Vawiina hun hmanah hian Ferrando English Medium School zirlai naupangte chu zirtirna hrang hrang pek an ni a, hun hlawk thlak tak hman a ni.



MNF

Mizo National Front chuan vawiin khan kum 2026 atan an pisa an hawng a, Party Resolution hrang hrang chu lungrual taka pawm niin President Pu Zoramthanga kaihhruaina hnuaiah thawhhona tha tak nen Mizorama Sorkar tha tak siam leh turin theihtawp an chhuah dawn thu an sawi.

MNF Party hian vawiin khan Resolution hrang hrang lungrual takin an pawm a, heng zingah hian Aizawl Municipal Corporation Inthlan lo awm turah MNF chuan Candidate tha tak tak an nei dawn an ti a, Aizawl khawpui hmasawna leh than zelna turin AMC Election lo awm turah hnehna sang tak chan an in beisei tih sawiin Ram rorelna ah Opposition Party ni chungin MNF chuan hniam lam aian san lam panin, nasa takin hma an sawn zel an ti a, Sinlung Hills Council Election leh Dampa bial By Election-ah Ruling party hnehin chakna an chan bakah LADC Election neih zawh takah MNF MDC an tling tam ber an ti a, Village Council By election hmun hrang hrangah hnehna an chang tih sawiin AMC inthlan bakah inthlak lo awm zel turah beiseina sang tak an neih thu an sawi a ni.



KC RUNREMSANGI

Mizo hnam hla leh Pipu zai-te sak vanga hriat hlauh Pi K.C. Runremsangi chu kumin Republic Day lawmna-a India President chenna Rashtrapati Bhavan, New Delhi ah 'At Home' reception (inlawmna) neihna turah tel tura sawmna a dawng.

India Post kaltlangin Rashtrapati Bhavan atangin a bik taka chei leh buatsaih sawmnaah hian Hmarchhak biala chengte, pi leh pute atanga an thil rochun, hlu leh mawi tak takte tarlana dah tel a ni a, India President Pi Droupadi Murmu sawmna hi Aizawl Head Post Office thawktu ten Pi K.C. Runremsangi hnenah Directorate of Art & Culture Pisa-ah an hlan a ni.



STATE LEVEL MOCK EXERCISE

Chhiatrupna thlen thulha chhanchhuah leh chhawmdawl hna kalpui dan tur, a taka enchhinna 'State Level Mock Exercise on Earthquake' chu National Disaster Management Authority leh Disaster Management & Rehabilitation Department bultumin Mizoram district tinah kalpui a ni.

Lirngching avangin Mizoram district hrang hranga hmun 36-ah inchim, kangmei chhuak leh chhiatna hrang hrang thlen theih dan lem chan a ni a. Chawhma dar 10 atang khan tih chhinna hi kalpui tan a ni a. District tin a Quick Response

Force-te, Fire & Emergency services -te, National Disaster Response Force, State Disaster Response Force, Assam leh Tripura atangin Central Industrial Security Force, Assam Rifles, Border Security Force, Medical team, tlawmngai pawl leh volunteer-te mawhphurhna ataka an kalpui dan enchhin a ni a. Lirnghing vanga In chim, kangmei chhuak, kawng ping, inbiakpawhna chhia thleng thei kara chhanchhuah leh chhawmdawl hna awmze nei taka kalpui dan tih chhinna ah hian Line Department hrang hrang, PHE, PWD, P&E, Transport Department, I&PR leh a dangte pawh an tel a. Hliam enkawlna hmun 'Relief Camp' te hi a hmunah NDMA leh DM&R hotute hian an tlawh bawk a ni.

Khaw thim hnua chhanchhuah leh chhawmdawl hna kalpui kawngah harsatna a awm leh awm loh hriat a nih theih nan State Level Mock Exercise hi tlai dar 5 atangin kalpui leh tur a ni ang.

